

- 1472 *Melamphilus*, & *Cyparisia* novissime, ut nunc Samos: feris ob solitudinem referta est. Hic classis tam diu fuit, donec equi longa jactatione fessi in herbido reficerentur. Interim milites sociique navales in terra expositi venationi & epulis indulgent. Classium præfecti cum Veneto imperatore statuunt Attaliam, Pamphiliæ urbem, ab Attalo Rege conditam, subita oppugnatione aggredi. Est ea civitas hoc tempore omnium maritimarum Asiæ maxima, portum habens ab utroque latere turribus munitum, catenæque firmissima clausum. Ægyptiî Syriique negotiatores id commune totius provinciæ emporium celebrant. Scalas itaque & crates subito a præfectis navium parari Mocenicus mandat: quibus naviter expeditis, ex Samo, zephyro flante, Attaliam oppugnatum ire pergit: ad Chelidonias insulas delatus, duas auxiliares a Rhodiensibus triremes accepit. Erat universæ classis numerus quinque & octoginta: quarum viginti Pontifex miserat, Ferdinandus decem & septem, Rhodiî duas, sex & quadraginta Venetorum erant. Ex Chelidoniis classis jam inclinante die profecta, ad tertiam sequentis diei horam hostium littoribus est appulsa. Hinc Victorem Superantium legatum cum decem navibus ad portum urbis occupandum Mocenicus mittit: Maripetrum alterum legatum cum navalibus copiis a continenti urbem aversa parte aggredi jubet: equitibus mandat, ut collem Attaliæ proximum præsidii causa celerî cursu occupent. Jubet ad hæc, omnes propriæ virtutis esse memores: atque interim non ignorare, cum imbelli, &, quod plus esset, imparato hoste sibi rem futuram: eam præterea urbem oppugnari, quæ capta ad unum omnes esset ditatura. Cum his e navibus missi mira omnes alacritate ac spei pleni ad urbem tendunt: ipse cum sociorum legatis pugnæ spectator prætorîa navi se continet. Equites irrequieto cursu confestim ad collem pervenere. Superantius, navî remis impulsâ, per tela & sagittas primus omnium, catena abrupta, portum obtinet: secutæ reliquæ triremes, turres circa portum, trucidatis qui intus erant, continuo capiunt. Occupant & suburbana te-
- ta,

*Attaliam
urbem Mo-
cenicus co-
piis Pontifi-
cis & Fer-
dinandi
adjutus
expugnat*